

**'AMK Baru' pula pertaruh tujuh manifesto
MalaysiaKini.com
Feb 15, 2014**

ADUN Batu Caves, Amir Shari dan ADUN Seberang Jaya, Dr Afif Bahardin yang menawarkan diri untuk jawatan ketua dan timbalan AMK sebagai pasukan 'AMK Baru' dalam pemilihan akan datang mengumumkan manifesto mereka yang dikenali sebagai '7 Gagasan Angkatan Muda', petang ini.

Tujuh gagasan itu adalah - memperkuat AMK, perkaderan anggota, membela nasib anak muda, pendidikan dan latihan politik, gerakan mahasiswa dan aktivisme anak muda, muafakat pemuda Pakatan Rakyat, serta menuju Putrajaya.

Di majlis yang berlangsung di Dewan Kelab Sultan Sulaiman, Kampung Baru itu, Amir turut memperkenalkan tiga calon naib ketua AMK dari pasukannya - peguam terkemuka Radzlan Jalaludin, Sangetha Jayakumar dan Raymond Bin Ahuar.

Bercakap dalam satu sidang media, Amir menjelaskan bahawa pasukannya akan bergerak dengan lebih jelas untuk memperkukuhkan PKR sebagai sebuah parti.

"Yang pentingnya pada saya kita menggariskan sasaran dan kerja yang jelas untuk kerja dan tugas anak-anak muda untuk memperkuat parti dan mengerakkan perubahan di Malaysia," katanya.

Terdahulu, Dr Afif menegaskan yang pasukan itu sebenarnya tidak semata-mata menawarkan individu sebagai calon tetapi membuat tawaran tujuh manifesto itu sebagai janji bersama.

"AMK Baru tidak tawarkan individu. Kami tawarkan tujuh gagasan untuk anggota KEADILAN," kata Afif merujuk kepada KEADILAN sebagai istilah anggota parti untuk PKR.

Copyright © 1999-2014 Mkini Dotcom Sdn. Bhd
Source: <http://www.malaysiakini.com/news/254482>